



1913-yil aprel oyidan chiqib boshlagan

Fidoyilik —
Vatanga xizmat demak!

2024-yil 11-sentabr, chorshanba,
104 (23.981)-son

**KUN
HIKMATI**

Ota-onadan
yaxshi fazilatlarini
o'zlashtirmagan
bolaga tarbiya
berish qiyin
kechadi

Zarafshon



www.zarnews.uz https://www.facebook.com/zarnews.uz @zarnews_uz https://twitter.com/zarnews_uz

5-sentabr kuni Prezident Shavkat Mirziyoyev raisligida elektrotexnika sohasida ishlab chiqarish, eksport va investitsiyalarni ko'paytirish masalalariga bag'ishlangan videoselektor yig'ilishi bo'lib o'tdi. Tahliiliy ruhda o'tgan yig'ilishda sohada amalga oshirilishi lozim bo'lgan vazifalar aniq belgilab berildi. Muxbirimiz ayni yo'nalishda viloyatdagi mavjud holat va galdagi rejalar bilan qiziqdi.

Elektrotexnika sanoati: holat va reja

Ma'lumotlarga ko'ra, bugungi kunda shahar va tumanlarda 54 ta elektrotexnika mahsulotlari ishlab chiqaruvchi korxonalar mavjud va ularda ikki mingga yaqin ishchi faoliyat ko'rsatmoqda. Ushbu korxonalar tomonidan joriy yil 7 oyi davomida 595 milliard so'mlik (o'tgan yilning mos davrida 462 milliard so'm) mahsulot ishlab chiqarilib, o'sish sur'ati 112 foizni tashkil etgan.

O'tgan yilda 62 turdagi mahsulot ishlab chiqarilgan bo'lsa, bugungi kunda viloyatimizda 80 turdan ortiq elektrotexnika mahsulotlari tayyorlanadi.

Xususan, sanoatchilarimiz muzlatkich, sovutkich, changyutkich, maishiy kir yuvish uskunalar, har xil turdagi gaz plitalari, avtobus va yuk avtomobillari uchun isitish pechlar, nasos uskunalar uchun uzellar, "TMG" rusumli transformatorlar, yuqori kuchlanishli vakuumli o'chirish uskunalar, kabel lotkalari va boshqa kichik maishiy texnikalar ishlab chiqarmoqda.

Bu borada Samarqand shahrida joylashgan sobiq "Sino" zavodi qayta tiklangani alohida qayd etish mumkin. "Saxari" mas'uliyati cheklangan jamiyati zavodning barcha qarzarlarini to'lab, 49,5 milliard so'mlik zamonaviy muzlatkich va ehtiyot qismlar ishlab chiqarmoqda.

Kattaqo'rg'on tumanida tashkil qilingan "Kattaqo'rg'on elektrotexnika zavodi" mas'uliyati cheklangan jamiyati ham sohada amalga oshirilgan yirik loyihalardan biri. Ushbu korxonada yiliga 42,4 milliard so'mlik kuchlanish va tok o'lchov transformatorlari ishlab chiqarilmoqda. Muhimi, bu yerda 85 ta ish o'rni yaratilgan.

Elektrotexnika sanoatida

ishlab chiqarilgan mahsulot hajmining jami sanoatdagi ulushi 2,7 foizni, yalpi hududiy mahsulotdagi ulushi esa 1,3 foizni tashkil etmoqda.

Albatta, bu yakuniy raqamlar emas. Shu bois joriy yilning o'tgan davrida umumiy qiymati 60,7 milliard so'mlik 3 ta loyiha ishga tushirilib, 175 ta ish o'rni yaratildi. Jumladan, Nurobod tumanida "TECOM ELEVATING SYSTEMS" mas'uliyati cheklangan jamiyati 34,8 milliard so'mlik loyiha asosida lift, eskalator va metallarkas ishlab chiqarishni yo'lga qo'ydi.

Umuman, joriy yilda sohada qiymati 697,5 milliard so'mlik 19 ta loyiha ishga tushiriladi va 700 ga yaqin yangi ish o'rni yaratiladi. Misol uchun, Urgut tumanida "BENDESIDO" mas'uliyati cheklangan jamiyatining qiymati 48 milliard so'mlik zamonaviy maishiy texnika vositalari ishlab chiqarishni tashkil etish loyihasi yo'lga qo'yilgach, 30 ta ish o'rni yaratiladi.

Ma'lum qilinishicha, viloyatda elektrotexnika mahsulotlari "IDEAL", "ELITE", "KLEO", "FERRE" kabi savdo belgilari bilan ishlab chiqariladi. Ularning soni va salmog'ini oshirish uchun rivojlangan davlatlar bilan hamkorlik aloqalari yo'lga qo'yilmoqda.

Birgina misol, Xitoy Xalq Respublikasiga xizmat safarlari davomida qiymati 474 million dollarlik 12 ta loyihani amalga oshirish bo'yicha kelishuvga erishilgan. Ushbu loyihalar 2024-2025-yillarda amalga oshiriladi.

Demak, hali ko'plab yangi turdagi mahsulotlar ishlab chiqarish yo'lga qo'yiladi. Va asosiy, yuzlab hamyurtlarimiz muqim ish bilan ta'minlanadi.

Y.MARQAYEV tayyorladi.

DUNYO TO'QIMACHILIK SANOATI VAKILLARI ANJUMANI



Samarqandda Xalqaro to'qimachilik ishlab chiqaruvchilari federatsiyasi (ITMF) va Xalqaro kiyim-kechak federatsiyasi (IAF)ning "Innovatsiyalar, hamkorlik va tartibga solish — to'qimachilik sanoati va kiyim-kechak ishlab chiqarishning harakatlantiruvchi kuchlari" mavzusidagi yillik konferensiyasi o'tkazildi.

Mazkur nufuzli tashkilotlar tomonidan O'zbekiston Savdo-sanoat palatasi va "O'zto'qimachilik sanoati" uyushmasi bilan hamkorlikda o'tkazilayotgan anjumanda ITMF va IAFga a'zo davlatlar, yirik to'qimachilik kompaniyalari, dunyoga mashhur brendlar, moliya institutlarining 500 dan ortiq vakillari ishtirok etdi.

ITMF dunyoning 123 ta eng yirik to'qimachilik uyushmalarini birlashtiradigan va ular tarkibidagi

to'qimachilik korxonalarini kengaytirishga yordam beradigan tashkilotdir. IAF esa 60 ta mamlakat uyushmalari va ular tarkibidagi 100 mingdan ortiq brendlar va chakana savdo kompaniyalarini birlashtiradi. Mamlakatimiz 2014-yilda Xalqaro to'qimachilik ishlab chiqaruvchilari federatsiyasiga, 2020-yilda esa Xalqaro kiyim-kechak federatsiyasiga a'zo bo'lgan.

Anjumanning tantanali ochilish marosimida O'zbekiston Respublikasi Prezidenti Shavkat Mirziyoyevning anjuman qatnashchilariga tabrigini O'zbekiston Bosh vaziri o'rinbosari J. Xo'jayev o'qib eshittirdi.

Yurtimizda bugungi kunda to'qimachilik mahsulotlari ishlab chiqarish hajmi 5 barobar ko'paydi, eksport 4 karra ortdi. Eng muhimi, ilgari sohada eksportning 70 foizi xomashyo hissasiga to'g'ri kelgan bo'lsa, bugungi kunda chetga sotilayotgan tovarlarning 60 foizini tayyor mahsulotlar tashkil etmoqda.

Anjumanda viloyat hokimi E.Turdimov, O'zbekis-

ton Savdo-sanoat palatasi raisi D.Vahobov so'zga chiqib, mamlakatimizda, jumladan, Samarqand viloyatida to'qimachilik sanoatini rivojlantirish, paxta tolasi ishlab chiqarish va uni qayta ishlash borasida gi ishlar haqida ma'lumot berdi.

Ochilish marosimida so'zga chiqqan Xalqaro to'qimachilik ishlab chiqaruvchilari federatsiyasi prezidenti Key Vi Shrinavasana va Xalqaro kiyim-kechak federatsiyasi prezidenti Chem Altan Markaziy Osiyo davlatlarida ilk bor O'zbekistonda o'tkazilayotgan mazkur anjumanning yuqori saviyada tashkil etilgan uchun minnatdorlik bildirdi. Bugungi kunda dunyo bozorida to'qimachilik mahsulotlariga bo'lgan talab, tabiiy xomashyo va sun'iy materiallardan tayyorlanayotgan mahsulotlar savdosi, narx tendensiyalarining o'zgarib borayotganiga e'tibor qarattildi.

Anjuman qatnashchilari O'zbekistonda to'qimachilik sanoatining rivojlanishi va istiqboliga oid ko'rgazma, yurtimizdagi yetakchi ishlab chiqaruvchilar mahsulotlari namoyishi bilan tanishdi.

Fazliddin RO'ZIBOYEV.

Yangi o'quv yili yangi binoda boshlandi

Samarqand davlat chet tillar institutida 2000 o'rinli yangi o'quv binosi foydalanishga topshirildi.

Institutning 74 milliard 287 million so'm mablag'i hisobidan bunyod etilgan 7 qavatli binoda 85 ta o'quv xonasi, zamonaviy axborot texnologiyalari bilan jihozlangan 300 o'rinli mustaqil ta'lim xonasi, 320 o'rinli faollar zali, axborot-resurs markazi, 2 ta sinxron tarjima amaliyoti xonasi, muzey, konferensiyalar zali hamda sport va ma'naviy-ma'rifiy tadbirlarga mo'ljallangan 5 ta xona mavjud. Bu yerda uchta fakultet talabalarini tahsil oladi.

Yangi binoning ochilish marosimida viloyat hokimi o'rinbosari H.To'xtayev ishtirok etib, institut professor-o'qituvchilari va talabalarini o'quv yili boshlanishi bilan tabrikkladi.


Bugungi kunda Samarqand davlat chet



tillar institutida 11 ming 594 nafar talaba tahsil oladi. 2024/2025-o'quv yilida 1600 nafardan ziyod yigit-qizga mazkur ta'lim dargohi talabaligi nasib etdi.

Yangi bino foydalanishga topshirilishi bilan institut o'quv binolari 6 taga, o'rinlar soni esa 6240 taga yetdi. Shuningdek, hozirda muassasada 2020 o'rinli 5 ta talabalar turarjoyi mavjud. Ayni paytda yana 400 o'rinli talabalar turarjoyi barpo etilmoqda.

Bir jumlada



Samarqand shahrida "Zarmed" universitetining 21 ta bakalavriat, 5 ta magistratura va 17 ta ordinatura ta'lim yo'nalishlari mavjud bo'lgan Samarqand kampusi ish boshladi.

Kattaqo'rg'onlik bokschi Sevara Mamatova -60 kilogram vazn toifasida Osiyo chempionatining oltin medalini qo'lga kiritdi.

Ishtixon tumanidagi ijtimoiy himoyaga muhtoj, boquvchisini yo'qotgan xotin-qizlarning 421 nafariga bir martalik moddiy yordam pullari (BHMning o'rt baravarigacha 1 million 200 ming) so'm miqdorida tarqatildi.

Kattaqo'rg'on tumanining Bog'ot mahallasi-da uchta ko'pqavatli, 90 xonadonli turarjoy majmuasi barpo etildi.

Nurobod tumani hokimligi hamda Hindistonning Larsen & Toubro: L&T kompaniyasi vakillari o'rtasidagi uchrashuvda tumanning Sazaq'on va Olg'a mahallalar hududida quvvati 500 MVt quyosh fotoelektr stansiyasi, quvvati 334 MVt bo'lgan elektr energiyasini saqlash tizimi hamda uning faoliyatini ta'minlashga xizmat qiluvchi podstantsiya qurish loyihalari bo'yicha o'zaro manfaatli kelishuvlarga erishildi.

Payariq tumanida Majburiy ijro bo'limi tomonidan jarima maydoniga olingan 5 ta "BELARUS-1523" traktori auktsion savdolariga chiqarildi.

Past Darg'om tumani Po'latchi mahallasining "Ipak yo'li" ko'chasida hashar yo'li bilan 1500 metrlik piyodalar yo'lakchasi barpo etishga kirishildi.

Paxtachida o'tkazilgan mehnat yarmarkasida 21 nafar fuqaro o'zlariga mos yo'nalishlar bo'yicha ishga joylashtirildi.

Samarqand tumanidagi 25-umumiy o'rta ta'lim maktabining 5 ta sinfxona hamda kutubxonadan iborat qo'shimcha binosi foydalanishga topshirildi.

Tuzalmas dard tuzalyapti

«Ishga endi kelgan yillarimni xotirlayman, ahvol juda ayanchli edi. Koridor-dan, palatalardan taralayotgan qon hidiga chidab bo'lmadim. Har kuni o'lim holati, shifokor mutaxassis kam. Borlari ham bu sharoitda ishlashga ko'nikolmaydi...»

Yaqinda mamlakatimiz rahbari farmoniga ko'ra, II darajali "Salomatlik" ordeniga sazovor bo'lgan Zokir Sa'diyev bilan suhbatimiz shifokorning bu dargohga ishga kelgan yillari xotirasidan boshlandi.

- Bu yil ushbu dargohda ishlaganimga roppa-roppa 30 yil to'ldi, - deydi viloyat bolalar ko'p tarmoqli tibbiyot markazi gematologiya bo'limi mudiri, II darajali "Salomatlik" ordeni sohibi Zokir Sa'diyev. - Gematologiya bo'limida ahvol juda ayanchli edi o'sha paytda. Oqqon bilan og'rikan bemorlarga quyilayotgan qon plazmasining sifati yaxshimas, har kuni o'lim holati kuzatilardi. Shifokor sanoqli, bemor ko'p, davolashning samaradorlik ko'rsatkichi juda past. Bunday sharoitda ishlash kishiga ma'nadan og'riq beradi, ishingdan ko'nging to'lmaydi, lekin o'zgarish bo'lishiga ishonching, umidning so'nmaydi. O'sha yillari ustozimiz Ilyas Bogdanov hamkorligida qator izlanishlar olib bordik. U kishining tashabbusi bilan ilk bor yangi davolash usuli - BFM joriy etildi va yaxshi samara bera boshladi. Yillar o'tgani sayin



davolanish yanada takomillashdi, sog'ayayotgan bolajonlar soni ko'paydi.

Ayniqsa, keyingi yillarda ularni dori-darmon bilan ta'minlash masalasiga alohida e'tibor qaratilib, to'liq ta'minot amalga oshirilyapti. Bugun 70 foiz bola uzoq muddatli remissiyaga chiqyapti. Ya'ni, ikki yil to'liq, rejali asosda muolaja olgach, uch yil yana shifokor nazoratida bo'ladi va shundan keyin ular

to'la nazoratdan chiqariladi. Bu degani - ular to'la sog'ayib ketishi va qayta kasallanmasligiga ishonch bor. Afsuski, ba'zida bemor bolalarning ota-onalari tashxisni eshitgach, qo'rqib ketishadi. «Yo'q, mening bolam oqqon kasaliga chalinmagan», deya tabiblariga borishadi. Afsuski, bolaning ahvolini og'irlashtirib kelganlar ham ko'p.

Yaqin yillarda ushbu markazda biz orzu qilgan yana bir muhim muolaja - ilik ko'chirish operatsiyasi amalga oshirilishi rejalashtirilmoqda. Yaxshi bilasiz, bemor bolalar bu yerda uzoq muddat davolanгани sababli darslarni o'zlashtirmay qolardi. Yaqinda shu bo'limning o'zida "Mehrlilik maktab" ochildi. Eng zamonaviy sharoitga ega bo'lgan maktab bolajonlarning sevimli maskaniga aylandi.

- Tibbiyotdagi islohotlar, o'zgarishlar yilda emas, har oyda ko'zga tashlanayapti, - deydi Z.Sa'diyev. - Mamlakatimiz rahbari bu masalaga eng dolzarb vazifa sifatida e'tibor qaratayotgani quyi tizimlarda yaqqol sezilyapti. Mustaqillik bayramining 33 yillik tabrigida ham bu soha alohida tilga olindi. Hozirgi kunda Yangi O'zbekistonni barpo etishda asosiy e'tiborni beshta ustuvor yo'nalishga qaratmoqdami. Bular avvalo, sifati ta'lim tizimini yo'lga qo'yish, biznesni rivojlantirish, korrupsiyadan xoli, adolatlilik tizimini yaratish, sog'liqni saqlash sohasini tubdan yaxshilash, ekologik barqarorlikni ta'minlashdan iborat, deb ta'kidladi Prezidentimiz.

Shifokor uchun bemorning tuzalishidan ortiqroq maqsad yo'q. Shu masalada bugun davlatimiz tomonidan keng ko'lamdagi ishlarning olib borilayotgani salomatlik posbonlariga e'tibor hamdir.

Gulruh MO'MINOVA.

OLY TA'LIM MUASSASALARI YANGI O'QUV YILINI QANDAY BOSHLADI?

2024-2025-o'quv yilida Samarqand davlat universitetiga 1035 nafar abituriyent davlat granti, 2274 nafari to'lov-kontrakt asosida o'qishga qabul qilindi. Shuningdek, universitetda grafika: xattotlik va miniatyura, cholg'u ijrochiligi: xalq cholg'ulari (zarbli cholg'ular), xoreografiya: zamonaviy raqs, falsafa, filologiya va tillarni o'qitish: turk tili, siyosatshunoslik, yurisprudensiya, davlat va jamiyat boshqaruvi, meteorologiya va iqlimshunoslik, axborot xavfsizligi, texnologik jarayonlar va ishlab chiqarishni avtomatlashtirish, geodeziya va geoinformatika, fundamental tibbiyot kabi yangi yo'nalishlar ochildi.

Bundan tashqari, universitetda xorijiy oliy ta'lim muassasalari bilan hamkorlikda xalqaro qo'shma ta'lim dasturlari bo'yicha bakalavriat ta'lim shaklida psixologiya, biologiya, kimyo, iqtisodiyot, xalqaro munosabatlar kabi yo'nalishlar tashkil etildi.

Qo'shma ta'lim dasturlarining magistratura ta'lim shaklida muzeysunoslik, tarixiy-madaniy obyektlarni konservatsiya qilish, ta'mirlash va saqlash, xalqaro munosabatlar va zamonaviy siyosiy jarayonlar, hujjatchi, hujjatshunoslik va arxivshunoslik kabi o'ndan ortiq yo'nalishlar tashkil etildi.



TIBBIYOT UNIVERSITETIDA YANGI YO'NALISHLAR OCHILDI

Samarqand davlat tibbiyot universitetining bakalavriat ta'lim shakliga 530 nafar talaba davlat granti, 591 nafari to'lov-kontrakt asosida o'qishga qabul qilindi. Magistratura ta'lim shakliga 78 nafar tinglovchi talaba davlat granti, 61 nafari to'lov-kontrakt asosida, klinik ordinatura-ga 37 nafar tinglovchi davlat granti, 372 nafar to'lov-kontrakt, 63 nafar maqsadli shartnoma asosida o'qishga tavsiya etildi.

Universitetda 2024-2025-o'quv yilidan biotibbiyot muhandisligi yo'nalishi ochildi. Xalq tabobati yo'nalishining nomi fundamental tibbiyot (tibbiy biologik ish va xalq tabobati) nomiga o'zgartirildi.

Bundan tashqari, universitetda yangi o'quv yilidan AQShning Vebster universiteti, Polshaning Pomorsk universiteti, Rossiya Federatsiyasining I.Ulyanov nomidagi Chuvashiya davlat universiteti, Saratov davlat tibbiyot universiteti, Oltoy davlat tibbiyot universiteti, Privojsk tadqiqot tibbiyot universiteti, Shinjon tibbiyot universiteti (Xitoy Respublikasi) va Tojikiston davlat tibbiyot universiteti bilan hamkorlikda bakalavriat qo'shma ta'lim dasturi bo'yicha klinik psixologiya, kosmetologiya, farmatsiya, fundamental tibbiyot, hamshiralik ishi, davolash ishi, stomatologiya, pediatriya ishi kabi yo'nalishlar ochildi. Hamkorlik shartnomasiga ko'ra, talabalar 3+1, 2+1, 3+2 ta'lim dasturlari bo'yicha o'qish va ikki diplomli bo'lish imkoniga ega bo'ldi.

Universitet akademik va moliyaviy mustaqillikka ega bo'lgani uchun o'quv yili kontrakt-to'lov summasini stipendiyasiz 12 million 75 ming so'm etib belgiladi. Ushbu kontrakt summasi faqat 1-kurslarga tatbiq etiladi.

GEOMATIKA MUHANDISLIGI KAFEDRASINING FILIALI TASHKIL ETILDI

Mirzo Ulug'bek nomidagi Samarqand davlat arxitektura-qurilish universiteti hamda respublika aerogeodeziya markazi Samarqand hududlararo bo'linmasi o'rtasida hamkorlik aloqalari o'rnatildi. Unga ko'ra, markazning viloyat bo'linmasida geomatika muhandisligi kafedrasining filiali tashkil qilindi. Yangi o'quv yilidan boshlab geomatika mu-

handisligi kafedrasida filialida kadastr, geomatika muhandisligi, geodeziya, kartografiya va kadastr hamda geodeziya va geoinformatika ta'lim yo'nalishlari talabalariga fan-ta'lim va ishlab chiqarish integratsiyasini amalga oshirishda dual ta'lim yo'lga qo'yiladi.

IKKITA OLY TA'LIM MUASSASASIDA OZIY-OVQAT TEXNOLOGIYASI YO'NALISHI MUTAXASSISI TAYYORLANDI

Samarqand davlat veterinariya meditsinasi, chorvachilik va biotexnologiyalar universitetiga 2024-2025-o'quv yili uchun bakalavriatning kunduzgi ta'lim yo'nalishlariga 401 nafar abituriyent davlat granti, 768 nafari to'lov-kontrakt asosida o'qishga qabul qilindi.

Universitetning sirtqi ta'lim shaklidagi yo'nalishlariga 13 nafar abituriyent davlat granti, 652 nafari to'lov-kontrakt asosida talabalikka tavsiya etildi.

Samarqand agroinnovatsiyalar va tadqiqotlar institutida kunduzgi ta'limga 379 nafar abituriyent talabalikka tavsiya etildi. Shundan 98 nafari davlat granti, 281 nafari to'lov-kontrakt asosida o'qishga qabul qilindi.

Sirtqi ta'lim yo'nalishlarida esa 3 nafar abituriyent davlat granti, 102 nafari to'lov-kontrakt asosida talabalikka tavsiya etildi. Ikkala oliy ta'lim muassasasida ham oziy-ovqat texnologiyasi yo'nalishi ochildi.

VILOYATDA XUSUSIY OLY TA'LIM MUASSASALARI SONI BESHTAGA YETDI

Bugun viloyatda davlat oliy ta'lim muassasalari bilan birga xususiy oliy ta'lim muassasalari ham faoliyat yuritmoqda.

Viloyat oliy ta'lim, fan va innovatsiyalar boshqarmasining ma'lum qilishicha, viloyatda nodavlat ta'lim xizmatlari ko'rsatish huquqini beruvchi litsenziyaga ega nodavlat oliy ta'lim muassasalari soni beshtaga yetgan. Ular Samarqand xalqaro texnologiya universiteti, Toshkent kimyo xalqaro universiteti Samarqand filiali, ISFT Samarqand filiali, Zarmed universiteti Samarqand filiali, Iqtisodiyot va pedagogika universiteti Samarqand filialidir.

Xurshida ERNAZAROVA.



MEHNAT QILISH uchun ham aql kerak

Toyloq tumanining Tapaqshloq mahallasiga ijodiy safarimiz chog'ida bir yosh hunarmandning uyidan uzoqlashmasdan mo'ay daromad topayotgani, nagonirli bo'lgan yigit mutaxassisligi bo'yicha ish topolmayotgani, nuroniy otaxonning tomorqada mehnat qilib, to'rt ro'zg'orni obod qilayotgani kabi turli holatlarga guvoh bo'ldik.

XORIYDA CHEKILGAN AZOB

Mahalla yoshlaridan biri Farruh Ochilov avval maktabni, keyin esa kasb-hunar kollejni tamomladi. Oliy o'quv yurtiga kira olmogach, xorijda, hali u davlatda, hali bu davlatda mehnat qildi.

- Rossiyada ishlagan paytimda oyiga 400 dollar toparim, - deydi u. - Yeb-ichish, ijara haqi, patent va boshqa hujjatlar xarajatidan ortirib, zo'rg'a 150-200 dollar atrofida mablag'ni uyga jo'natardim. Yakshanba kuniyam ishlardik. Kechayu kunduz tinimsiz mehnat qilgan kunlarim bo'lgan. Shunda ham ko'pi bilan 300 dollar ortira olardim, xolos. Oiladan olisda, pulsiz qolib ketishni tasavvur qilish qiyin...

"OYIGA 15 MILLION SO'M TOPYAPMAN..."

Farruh xorijdan qaytib, tomorqasida malina yetishtira boshladi. Shuningdek, payvandchilik hunarini o'rgandi. Malina hosili va u yer-bu yerda ishlab topgan mablag'i evaziga kichik payvandlash ustaxonasini tashkil qildi.

- Hozir bu yerda mo'ay daromad topyapman, - deydi Farruh. - To'g'risini aytsam, bir kunda 2,5-3 million so'mgacha topgan paytlarim bo'ldi. Ba'zan ko'proq, ba'zan kamroq, o'rtacha hisobda oyiga 15 million so'm topishga harakat qilayapman. Albatta, buning uchun ishlash kerak. Ishlash deganda jon kuydirib, tinimsiz mehnat qilishni nazarda tutmayapman. Haftada bir kun dam olaman. Qolgan kunlari 9 soat ishlayman. Tongda va kech paytlari tomorqada mehnat qilaman. Dastlab tomorqaga ikki qatorgina malina ekan bo'lsam, yildan-yilga ko'paytirib, bugungi kunda 7 sotix maydoni malinazorga aylantirganman.

MAHALLANING "DRAYVERI" - MALINACHILIK

Mahallada aholi tomorqalarining umumiy maydoni 52 gektarni tashkil etadi.

- Hududimizda 2 ta qishloq mavjud bo'lib, ularning

biridagi barcha hovlida malina yetishtiriladi, - deydi mahalla raisi Nuriddin Sobirov. - "Bir mahalla - bir mahsulot" tamoyili asosida eksport qiluvchi tadbirkorlar shu qishloqdan malina sotib olishadi. Har bir tomorqa egasi malina yetishtirib, o'rtacha 50 million so'm atrofida daromad topyapti.

PENSIONER TOMORQACHI

Mahalla nuroniyalaridan biri Sa'dulla Yo'ldoshev pensiyaga chiqqandan beri tomorqachilik bilan shug'ullanadi. Uning 1 sotixlik issiqxonasi bor. 4 sotix yerda malinazor tashkil qilgan.

- Dastlab qishlog'imizga malina ko'chatini mahalladoshimiz Xonbiyi aya keltirgan va ko'paytirgan, - deydi u. - Biz u kishidan 10-15 ta ko'chat olib, ekib boshlaganmiz. Bugungi kunda 4 sotix yerda malina parvarishlayapman. Keksalik davrida ermak bo'larkan. Ham mo'maygina daromad keltiryapti. Malinaning o'zidan bir mavsumda 15 million so'mdan ziyod daromad topamiz. Ko'chatini sotsak, u ham pul. Tomorqada bir qarich yerni bo'sh qoldirmaslikka harakat qilaman. Qator oralarida sabzavot mahsulotlarini yetishtiraman. O'zimizdan tashqari yana 3 farzandimning ro'zg'origa bir qishlik qishloq xo'jalik mahsulotlarini yetkazib beraman.

NOGIRONLIGI BO'LGAN YIGITGA ISH KERAK, AMMO...

Shu mahallada yashovchi Husan Abdurahmonov nogironligi bo'lsa ham turmush o'rtog'i bilan birga bir sotix yerda malina yetishtiradi. Uning ko'zi ojiz, ammo iste'dodli yigit.

- Dastlab ko'zi ojiz bolalar maktab-internatini tamomlab, Toyloq pedagogika kollejida musiqa san'ati yo'nalishida ta'lim olganman, - deydi u. - Keyin shu yo'nalish bo'yicha Samarqand davlat universitetida o'qidim. Ayni paytda Toshkent davlat pedagogika universiteti magistrantiman.

Mahalla faollarining aytishicha, Husan juda kamtarin yigit. Ehtiyoji bo'lsa ham birovdan yordam so'rashni or biladi. Shu kunlarda unga ish kerak. Uyidan o'lisroq hududlarda ish bor, ammo uning uchun uzoqqa qatnab ishlash osonmas. Qishlog'idagi maktabda esa hozircha bo'sh ish o'rni yo'q ekan.

- Farzandimga shu yaqin atrofda ish topilsa, yaxshi bo'lardi, - deydi Husanning onasi. - Mas'ullar shu masalani hal etsa, juda minnatdor bo'lardik.

To'liq SIDDIQOV,
Baxtiyor MUSTANOV (surat).



Statistika boshqarmasiga ko'ra, viloyatimizda joriy yilning 1-avgust holatiga faoliyat ko'rsatayotgan xususiy korxonalar soni 4 821 ta bo'lib, o'tgan yilning mos davriga nisbatan 80,8 foizni tashkil etgan. Xususiy korxonalar sonining eng ko'p ulushi Samarqand shahrida 720 ta, Urgut tumanida 526, Ishtixonda 488, Narpayda 434 va Past Darg'omda 425 tani tashkil etmoqda.

Sayyoh o'zini xavfsiz his qilishi uchun...

Joriy yilning 7 oyida Samarqandga 3 million 904 ming nafarga yaqin sayyoh kelgan bo'lib, ularning 1 million 254 ming 700 nafari xorijlik hisoblanadi. Mehmonlarga 16529 o'rinni 170 ta mehmonxona, 380 ta oilaviy mehmon uyi, 100 ta xostel va 304 ta turkompaniya xizmat ko'rsatmoqda.

Maqola boshida bu raqamlarni bejiz keltirmadik. Milliy iqtisodiyotimizda ulushi tobora ortib borayotgan turizm sohasi viloyatimizning ham drayveri hisoblanadi. Shu bois uni rivojlantirish, xususan, xavfsiz turizmni ta'minlash konsepsiyasini hayotga tatbiq etish uchun bugun katta kuch va vositalar yo'naltirilgan. Ha, xalqaro maydonlarda ro'y berayotgan ziddiyatlar, ijtimoiy xavfli jinoyatlar sonining ortishi fonida xavfsizlik turizm istiqbolining eng muhim omili sifatida belgilanmoqda.

— Boshqarmaning xavfsizlik profilaktikasi guruhi tomonidan o'tgan 7 oyda 1096 ta ma'muriy huquqbuzarlik aniqlandi, - deydi viloyat ichki ishlar boshqarmasi xavfsiz turizmni ta'minlash boshqarmasi tashkiliy muvofiqlashtirish bo'linmasi boshlig'i Istam Sodiqov. - Shu davrda sayyohlardan 21223 ta og'zaki murojaat qabul qilingan bo'lib, 78 tasiga tibbiy yordam berish, 20999 holatda adashganlarga to'g'ri yo'l ko'rsatish va 146 ta holatda boshqa masalalar bo'yicha amaliy yordamlar berilgan. Kim uchundir bu raqamlar hech nimani anglatmas, biroq xavfsiz turizm nafaqat viloyatimizga sayyohlar oqimini oshiradi, balki yurtimizning xalqaro maydondagi nufuzini ko'tarishga ham xizmat qiladi.

Darhaqiqat, birgina joriy yilning o'tgan vaqtida viloyatimiz 100 dan ziyod xalqaro tadbirlar mezboni bo'ldi. Shu davrda boshqarma tomonidan viloyatga 24 ta xorijiy davlatdan kelgan 83 ta hamda BMT, Yevropa Ittifoqi, MDH, YUNESKO va boshqa xalqaro tashkilotlarning 18 ta delegatsiyasini kutib olish, xavfsizligini ta'minlash va kuzatish ishlari tashkil etilgan. Eng asosiysi, tashriflar davomida birorta ko'ngilsiz holatga yo'l qo'yilmagan.

— Xizmat joyimiz muqaddas qadamjolar, tarixiy obidalardaligi uchunni, ishga chiqqa-



nimda doim katta mas'uliyatni his qilamiz, - deydi boshqarmaning jamoat tartibini saqlash guruhi inspektori Aziz Ergashov. - Tizimda ishlayotganimga 3 yil bo'ldi. Kasbimni juda yaxshi ko'raman. Bir nechta xorijiy tilni bilganligimiz sababli xorijliklar bilan oson muloqotga kirisha olamiz. Ammo turist faqat xorijdan kelmaydi. Ichki sayyohlik ham rivojlanib bormoqda. Biz barcha sayyohlarning xavfsizligiga mas'ulmiz. E'tiborlisi, o'tgan davrda viloyatda mahalliy sayyohlar tomonidan va ularga nisbatan birorta jinoyat sodir etilmadi.

Boshqarma faoliyatining asosiy yo'nalishi jinoyatni fosh etish emas, uning oldini olishdir. Shu bois profilaktik tadbirlarga alohida e'tibor beriladi. Jumladan, hisobot davrida boshqarma tomonidan turli yo'nalishlarda 5099 marotaba profilaktik tadbir o'tkazilgan. Namoyish obyektlari va ularga tutashtirish hududlarida maqsadsiz yurgan 5908 nafar fuqaroning shaxsi aniqlashtirilib, 3037 nafari bilan profilaktik suhbat o'tkazilgan.

Ma'lumotlarga ko'ra, viloyatning tog'li hududlari, tumanlardagi sayyohlar gavjum bo'ladigan joylarda ham tegishli xizmat bo'limlari tashkil etilishi rejalashtirilgan. Bu esa xavfsiz turizmni ta'minlash konsepsiyasini qamrovini yanada kengaytirish imkonini beradi.

Asqar BAROTOV.

Talon-tarojlikning oldi olindi

Majburiy ijro byurosi viloyat boshqarmasi va "A.A.S" mas'uliyati cheklangan jamiyati o'rtasida tuzilgan shartnomaga ko'ra, byuroning hududiy boshqarmasi yoki uning tuman va shahar bo'limlari tomonidan sud va boshqa organlarning qarorlariga asosan davlat daromadiga o'tkazilgan mol-mulk realizatsiya qilish uchun "A.A.S" mas'uliyati cheklangan jamiyatiga topshiriladi. Korxonalar ushbu mol-mulkni realizatsiya qilishdan tushgan pul mablag'larini tegishli depozit yoki maxsus hisobraqamga o'tkazib berishi lozim.



O'tgan vaqtda byuroning Samarqand shahar bo'limi 57 turdagi jami 229 million 731 ming so'mlik zargarlik buyumlarini "A.A.S" mas'uliyati cheklangan jamiyatiga topshirgan. Ammo joriy yilning 18-yanvarda byuroning viloyat boshqarmasi tomonidan o'tkazilgan o'rganishda korxonalar direktori A.A. tomonidan sotuvga chiqarilgan mol-mulk qoldig'i ko'rsatilmagan. Shunday holat byuroning Jomboy tuman bo'limi tomonidan topshirilgan zargarlik

buyumlari bilan ham sodir bo'lgan.

O'rganish davomida byuroning Samarqand shahar va Jomboy tuman bo'limlari tomonidan topshirilgan jami 411 million 282 ming 704 so'mlik zargarlik buyumlarining sotuvidan tushgan mablag' byuro idorasi hisobraqamiga o'tkazilmaganligi aniqlandi hamda korxonalar direktori A.A.ga nisbatan jinoyat ishi qo'zg'atildi.

Jinoyat ishi bo'yicha o'tkazilgan tergov harakatlari davomida A.A. kamomadni

to'liq qopladi. Shu bilan birga, jinoyat ishlari bo'yicha Samarqand shahar sudi unga bazaviy hisoblash miqdorining 50 baravari, ya'ni 17 million so'm miqdorida jarima belgiladi.

**B. RAHIMOV,
MIB shaxsiy xavfsizlik
boshqarmasi katta inspektori.
A. MIRSHAYEV,
MIB viloyat boshqarmasi
shaxsiy xavfsizlik shu'basini
inspektori.**

Yurtimiz fuqarolarining manfaatlarini har yerda himoya qilinishi. Ular xoh mehnat qilish, hoh ta'lim olish uchun bo'lsin, xorijga chiqsa, ortlarida O'zbekiston degan davlat turganini, o'zlarining shu davlat himoyasida ekanini his etadilar. Buni bugun Amerika Qo'shma Shtatlarida yashayotgan urgultik yosh huquqshunos Muhammad Haqberdiyev ham e'tirof etmoqda.

G'o'slik Muhammad

AQShda migratsiya muammolarini tadqiq etmoqda



- Ilmiy tadqiqotlaringiz mohiyati, o'ziga xos jihatlari nima? Ularning natijalari haqida nimalar deya olasiz?

- Tadqiqotlarimga talablik yillarimda Oliy Majlis huzuridagi qonunchilik muammolari va parlament tadqiqotlari instituti qoshidagi "Yosh qonunshunoslar" klubiga a'zoligim turtki bo'lgan. Bu davrda biz ko'p marotaba deputatlar va xorijiy tashkilotlar vakillari bilan uchrashganmiz. Shu uchrashuvlar doirasida Jahon iqtisodiyoti va diplomatiya universitetida tashkil etilgan muhokamada ustozlarimiz va soha mutaxassislari tomonidan migratsiya va immigratsiya huquqi sohasida borayotgan jarayonlarni, ayniqsa, O'zbekiston nuqtai nazaridan tadqiq qilish dolzarblashayotgani ta'kidlangan edi. Shundan mening ilk izlanishlarim boshlandi.

Yoshlar, asosan, mehnat va ta'lim migratsiyasiga chiqib ketgan. Ularning katta qismi Rossiya, Qozog'iston, Turkiya va Janubiy Koreyada. "Sayyor qabullar" va "Xavfsiz migratsiya" loyihalarining birgalikdagi natijasi o'laroq, mamlakatimizdagi 10 mingga yaqin yoshlar yetakchilarini biz ishlab chiqqan xorijdagi yoshlar bilan ishlash tizimiga o'tkazish orqali xorijdagi 268 ming nafar yoshlar bilan aloqa o'rnatish va ko'pchiligining muammolarini yechishga muvaffaq bo'lganmiz.

- Bugun o'zbekistonlik yoshlar orasida migratsiya bilan bog'liq qanday muammolar bor? Ularga qanday yechimlar izlanayapti? Sizningcha, ta'lim

olish uchun ketayotgan talabalarning bilim darajasi qoniqarliligi?

- Migratsiyaga ketayotgan fuqarolarimiz duch kelayotgan asosiy muammolar ularning xorijiy mamlakat tilini bilmasliklari, ushbu mamlakat qonunchiligi va jamiyat qoidalaridan xabardor emasliklari, shuningdek, o'z huquqlarini bilmasliklari bilan bog'liq.

O'rganishlarim asosida olingan natijalarga ko'ra, yoshlarimiz migratsiyaga puxta tayyorgarlik ko'rmaydilar, hatto oddiy qoidalarni ham bilmasdan xorijga chiqadilar va buning oqibatida muammolar yuzaga keladi. Shaxsan o'zim ham chegara o'tkazish punktlaridagi masalalar va xorijiy mamlakatda qonuniy bo'lishning birinchi davrida qilinishi kerak bo'lgan ishlarning amalga oshirilmagani yuzasidan yuborilgan murojaatlar bilan juda ko'p ishlaganmiz.

Yuqoridagi muammolarning doimiy o'rganilishi tashkil etilib, davlat tashkilotlariga takliflar kiritilyapti va ba'zi masalalar yuzasidan yangi loyihalar ishlab chiqilyapti.

Tajribamiz shuni ko'rsatadiki, xorijga ta'lim olish uchun ketuvchilar asosan ikki turga bo'linib qolgan.

Birinchi - nufuzli oliy ta'lim muassasalariga intiluvchilar. Ular yuqori salohiyatga, til bilimlari va har tomonlarga keng dunyoqarashga ega hamda muammolarga duch kelish ehtimoli juda past.

Ikkinchi - o'rta yoki past mavqeli oliy o'quv yurtlariga ketuvchilar. Aksariyatining til bilish darajasi past. Oliyogha o'qishga kirishda odatda konsalting firmalari xizmatidan foydalanishadi. Ular ketma-ket yuzaga keluvchi muammolar girdobida qolishi mumkin.

- "Musofir" loyihasi haqida batafsilroq ma'lumot bersangiz.

- "Musofir" mobil ilovasi 2020-yilda ishga tushirilgan dasturiy ta'minot bo'lib, unda asosan, xorijdagi mehnat va ta'lim migratsiyasida bo'lgan fuqarolarimizga xorijga chiqish jarayonlari va qoidalar to'plami sifatida davlatlar kesimida ma'lumotlar bazasi shakllantirilgan. Loyiha 2022-yilda yangilangan holda ishga tushirildi va unga og'ir vaziyatda qolgan vatandoshlarimizga xayriya mablag'larini to'plash orqali yordam berish funksiyasi ham qo'shildi.

Bu yil 27 yoshni qarshi olayotgan Muhammad Haqberdiyev yaqinda Pensilvaniya shtatidagi Steyt Kollej shahrida joylashgan Pensilvaniya davlat universitetining "Penn State Law" huquq maktabi magistratura bosqichini tugatdi. U hozirda zamonaviy dunyoda inson huquqlari va immigratsiya qonunchiligi masalalarida ilmiy-tadqiqot faoliyatini davom ettirmoqda.

Nusrat BOBOYEV.

Samarqandda Xalqaro notariuslar ittifoqi Osiyo ishlari bo'yicha komissiyasining 14-yalpi yig'ilishi bo'lib o'tdi.
Yig'ilishda ittifoqning Osiyo ishlari bo'yicha komissiyasi a'zolari hamda o'ttizga yaqin davlat notariat tizimlaridan 300 nafar vakil ishtirok etdi.

Notariat sohasini raqamlashtirish - bugungi kun talabi



Tadbir avvalida O'zbekiston Notarial palatasi raisi, Xalqaro notariuslar ittifoqining Osiyo ishlari bo'yicha komissiyasi prezidenti Dilshod Ashurov komissiyaning bir yillik faoliyati hamda O'zbekistonda keyingi yillarda notariat sohasini rivojlantirish borasida amalga oshirilayotgan ishlar haqida ma'lumot berdi.

2021-yil 3-dekabrda Xalqaro notariuslar ittifoqiga a'zo bo'lgan O'zbekiston Notarial palatasi qisqa vaqt ichida ittifoq hamda uning Osiyo ishlari bo'yicha komissiyasida o'z o'rniga ega bo'ldi. Ayni paytda O'zbekiston notariati nafaqat xorijiy tajriba asosida takomillashmoqda, balki ko'plab davlatlar uchun andoza olish mumkin bo'lgan namunali tizim sifatida shakllandi. Shu bois Xalqaro notariuslar ittifoqining 2023-yil 21-iyuldagi qaroriga ko'ra, O'zbekiston Notarial palatasi raisi Dilshod Ashurov bir yil muddatga ittifoqning Osiyo ishlari komissiyasi prezidenti etib saylangandi.

Yig'ilish "Notariat sohasini raqamlashtirishni takomillashtirishda xorijiy amaliyotlar" mavzusida o'z ishini davom ettirdi. Xorijiy davlatlar notarial idoralari mas'ullari o'z mamlakatlarida bu borada amalga oshirilgan ishlar, kelgusidagi vazifalar haqida ma'ruza qildi, o'zaro fikr, tajriba almashildi.

REKLAMA, E'OLONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUROJAAT UCHUN TELEFON: 66-233-91-56

QORAKO'LCHILIK VA CHO'L EKOLOGIYASI ILMIIY-TADQIQOT INSTITUTI 2025-YIL UCHUN QUYIDAGI MUTAXASSISLIKLAR BO'YICHA TAYANCH DOKTORANTLAR VA MUSTAQIL IZLANUVCHILARNI QABUL QILADI

- 06.02.03.** - Xususiy zootexniya. Chorvachilik mahsulotlarini ishlab chiqarish texnologiyasi;
- 06.02.01.** - Qishloq xo'jalik hayvonlarini urchitish, ko'paytirish seleksiyasi va genetikasi;
- 06.01.08.** - O'simlikshunoslik.

Tayanch doktorantlar (PhD) va mustaqil izlanuvchilar sifatida talabgorlar quyidagi hujjatlarni taqdim etishlari lozim:

- institut direktori nomiga ariza;
- ilmiy maslahatchi (konsultantning) yozma roziligi;
- ma'lumotnoma;
- mehnat daftarchasining belgilangan tartibda tasdiqlangan nusxasi;
- oliy ma'lumoti to'g'risidagi hujjat (bakalavr va magistr diplomini hamda ilovasi) nusxasi;
- kadrlar bo'limi tomonidan tasdiqlangan shaxsiy varaqa (tarjimai hol bilan);
- chet tilini bilish darajasi haqida milliy sertifikat - "B1" va undan yuqori;
- jurnallarda chop etilgan ilmiy maqolalari (PhD tayanch doktorantlar - kamida bitta va tezislar ikkita) ro'yxati, shuningdek, ularning nusxalari;
- pasport nusxasi;
- 4 dona 3x4 sm. o'lchamdagi fotosurat.

Hujjatlar shu yil 15-sentabrdan 15-oktabrgacha qabul qilinadi.
Sayt: phd.mininnovation.uz

Ilk qabul qilingan tayanch doktorantlar va mustaqil izlanuvchilar faoliyati ular bilan tuziladigan mehnat shartnomasiga muvofiq 2025-yil 1-yanvardan boshlanadi.

Manzilimiz: Samarqand shahri Mirzo Ulug'bek ko'chasi, 47-uy. Qorako'lchilik va cho'l ekologiyasi ilmiy-tadqiqot instituti.
Murojaat uchun telefon: +99866-233-32-79.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Tursunov Suhrob Berdiqulov notarial idorasida marhum Kamalova Tatyana Rustamovna (2019-yil 12-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Tursunov Suhrob Berdiqulov notarial idorasiga murojaat etishlarini so'raymiz.
Manzil: Samarqand shahri Beruniy ko'chasi, 200-uy, 3-xona.

Jomboy tumanida xususiy amaliyot bilan shug'ullanuvchi notarius Mamatqulov Otabek Bolbekovich notarial idorasida marhum Baltayev Burxonga (2010-yil 10-aprelda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otabek Bolbekovich notarial idorasiga murojaat etishlarini so'raymiz.
Manzil: Jomboy tumani Saroy ko'chasi, 15-uy.

Payariq tumanida xususiy amaliyot bilan shug'ullanuvchi notarius Muhammadiyev Farhod Jo'raqulov notarial idorasida marhum Ibragimov Eshmamatga (2020-yil 23-avgustda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Muhammadiyev Farhod Jo'raqulov notarial idorasiga murojaat etishlarini so'raymiz.
Manzil: Payariq tumani Chelak shaharchasi, Istiqlol ko'chasi, 73-uy.

Samarqand shahrida xususiy amaliyot bilan shug'ullanuvchi notarius Narzullayeva Lola Shukurullayeva notarial idorasida marhum Odinayeva Gulmira Bahriddinovna (2021-yil 10-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Narzullayeva Lola Shukurullayeva notarial idorasiga murojaat etishlarini so'raymiz.
Manzil: Samarqand shahri Nodirabegim ko'chasi, 5/1-uy.

Samarqand shahrida xususiy amaliyot bilan shug'ullanuvchi notarius Ashurova Dilafuz Ziyodullayeva notarial idorasida marhum Gerasimova Lidiya Mixaylovna (2023-yil 8-avgustda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ashurova Dilafuz Ziyodullayeva notarial idorasiga murojaat etishlarini so'raymiz.
Manzil: Samarqand shahri Rudakiy ko'chasi, 132-uy, 2-xona.

Samarqand shahrida xususiy amaliyot bilan shug'ullanuvchi notarius Nishonova Umida Ismatillayeva notarial idorasida marhum Nazaryan Ruben Gamletovichga (2023-yil 10-aprelda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Nishonova Umida Ismatillayeva notarial idorasiga murojaat etishlarini so'raymiz.
Manzil: Samarqand shahri Rudakiy ko'chasi, 132-uy, 2-xona.

Samarqand shahrida xususiy amaliyot bilan shug'ullanuvchi notarius Bahromova Feruza Zoirnova notarial idorasida marhum Musinova Moxaramga (2021-yil 19-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Bahromova Feruza Zoirnova notarial idorasiga murojaat etishlarini so'raymiz.
Manzil: Samarqand shahri Gagarin ko'chasi, 121-uy.

Paxtachi tumanidagi "ZIYOVUDDIN TEXTILE" mas'uliyati cheklangan jamiyatining (STIR: 305893151) dumaloq muhri va burchak tamg'asi jamiyat tugatish boshqaruvisiga taqdim etilmaganligi sababli bekor qilinadi.
TOPGANGA MUKOFOT!
Samarqand viloyati ichki ishlar boshqarmasidan Xasanov Akram Saimovichga berilgan pensiya guvohnomasi Ishtixon tumani hududida tushirib qoldirilgan. Ushbu hujjati topganlardan mukofot evaziga qaytarishlarini so'raymiz.
Telefon: +99893-339-75-01.

Samarqand tumanida xususiy amaliyot bilan shug'ullanuvchi notarius Davronov Mahmud Hasan o'g'li notarial idorasida marhum Raxmonkulova Madina Rabbimkulovna (2023-yil 7-dekabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Davronov Mahmud Hasan o'g'li notarial idorasiga murojaat etishlarini so'raymiz.
Manzil: Samarqand tumani Oqmachit mahallasi, Bag'rikenglik ko'chasi, 4-uy.

Payariq tumanida xususiy amaliyot bilan shug'ullanuvchi notarius Ortiqboyev Aziz Azamatovich notarial idorasida marhum Djurayeva Saida Rasulovna (2020-yil 16-oktabrda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ortiqboyev Aziz Azamatovich notarial idorasiga murojaat etishlarini so'raymiz.
Manzil: Payariq tumani Chelak shaharchasi, Istiqlol ko'chasi, 73-uy.

Samarqand shahrida xususiy amaliyot bilan shug'ullanuvchi notarius Saidova Zarina Xisravovna notarial idorasida marhum Asiman ogli Djiyanga (2018-yil 6-fevralda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Saidova Zarina Xisravovna notarial idorasiga murojaat etishlarini so'raymiz.
Manzil: Samarqand shahri Abdurahmon Jomiy ko'chasi, 64-uy.

Samarqand shahrida xususiy amaliyot bilan shug'ullanuvchi notarius Nishonova Umida Ismatillayeva notarial idorasida marhum Nazaryan Ruben Gamletovichga (2023-yil 10-aprelda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Nishonova Umida Ismatillayeva notarial idorasiga murojaat etishlarini so'raymiz.
Manzil: Samarqand shahri Rudakiy ko'chasi, 132-uy, 2-xona.

Payariq tumanida xususiy amaliyot bilan shug'ullanuvchi notarius Ashurova Dilafuz Ziyodullayeva notarial idorasida marhum Gerasimova Lidiya Mixaylovna (2023-yil 8-avgustda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ashurova Dilafuz Ziyodullayeva notarial idorasiga murojaat etishlarini so'raymiz.
Manzil: Payariq tumani Chelak shaharchasi, Istiqlol ko'chasi, 110-uy.

Payariq tumanida xususiy amaliyot bilan shug'ullanuvchi notarius Muhammadiyev Farhod Jo'raqulov notarial idorasida marhum

XIRADMANDLIK ISTAKLARINING BILIMDONI

Saidahmadxo'ja Siddiqiy-Ajziy tomonidan Samarqandning Halvoyi qishlog'ida 1903-yilda qurilgan jadid maktabi binosi hozir ham saqlanib qolgan. Eski maktab binosi qayta ta'mirlanib, Siddiqiy-Ajziy uy-muzei sifatida faoliyat olib bormoqda. Afsuski, muzeyni eksponatlar bilan to'ldirish, o'sha davrga oid kitob va darsliklarni keltirish, zamonaviy multimediyali qurollar bilan jihozlash muammoli-gicha qolmoqda.



Misr yoki Shomdek jannatmakon, suvlari Nil daryosidek musaffo bo'lishi kerak.

XIX asr oxiri va XX asr boshlarida jadidlarni va boshqa barcha ziyolilarni mushohadaga chorlagan narsa – adabiy til va ona tili o'rtasidagi farqni isloh qilishdan iborat edi. O'sha davrda ham Turkiston ko'p millatli o'lka ekanligi, buning ustiga, sheva va lahjalaridan foydalanishdagi tartibning yo'qligi, rus va Yevropa tillaridan so'zlarning kirib kelishi adabiy til haqida yagona bir fikrga kelish shartligini taqozo etardi. Vaholanki, shoir ta'kidlamochi bo'lganidek, Samarqand xalqi turki-chig'atoy va tojik tilida so'zlovchi aholidan iborat, arab va rus tillarini o'rganish uchun tarjimonlar yetishmaydi. Dunyoga chiqishning yagona yo'li esa til o'rganishdan boshlanadi. Demak, Samarqand ahli turki-chig'atoy, o'zbek, tojik, rus va arab tillarini bilishlari zarur. Jahon taraqqiyotidan xabardor bo'lish, ilm-ma'rifati o'rganish, o'lka sanoat va boshqa yangiliklarni olib kirish uchun ham til bilish lozim.

Xalqni o'qimishli qilish, ma'rifati tarqatish, kitob do'koni faoliyatini shakllantirish kabi asosiy ishlar ham dostonidan o'rin olgan. Ayniqsa, maktab faoliyati, diniy, dunyoviy masalalar haqida fikr yuritir ekan, adib: Xitoy, Rim kabi davlatlarni misol tariqasida ko'rsatadi. Adib bir narsaga ishonadi, vaqti kelib, uning orzusidagi shahar paydo bo'ladi. Unda insonlar erkin va farovon kun kechiradi, o'z huquqlarini biladi, "zako'n"lar adolatli ishlaydi, asosiysi, huquqiy davlat tomonidan himoyalangan tili bo'ladi!

"Oyina" jurnalining 1914-yil 44-sonida Saidahmadxo'ja Siddiqiy-Ajziyning "Turkistonda maktab, jarida va ulamo" deb nomlangan maqolasi e'lon qilingan. "Mir'oti ibrat" dostoni uslubidan keskin farq qiluvchi ushbu maqolada jamiyatda sodir bo'layotgan voqea-hodisalar o'z aksini topgan. Ma'lumki, Turkistonda jadid maktablari o'z faoliyatini boshlagandan keyin bir tomondan ulamolarga, ikkinchi tomondan chor Rossiyasi vakillariga, uchinchi tomondan mahalliy xonliklarga yoqmagani edi. Chunki ulamolarning an'anaviy madrasa ta'limini yoqlagan bo'lsa, chor Rossiyasi vakillari rus-tuzem maktabi rivojiga e'tibor qaratir, xon va amirliklar shu paytgacha bo'lgan tizimni yo'qotib qo'yishni xohlamas edi. Jadid maktablarida esa ham diniy, ham dunyoviy bilim berilishi, buning ustiga mahalliy hamda boshqa tillar o'qitilishi, huquqiy ta'lim berilishi xavotirli edi. Jadid maktablari har tomonlama siquvga olingan bo'lsa-da, o'quvchilari soni oshib boraverdi. Adib ushbu maqolada geografiya fanining ahamiyati haqida gapirib, ulamolarning johilliklarini tanqid ostiga oladi. Zamonaviy va dunyoviy ta'lim rivojlanib borayotganligi, bundan ulamolarning xulosa chiqarishlari lozimligini ta'kidlaydi.

Afsuski, shu paytda Buxoro amirligida jadid maktablariga qarshi keskin kurash boshlangan, ularning ayrimlari yopilgan edi. Tabiiyki, bu jaholat Samarqandda ham o'z ta'sirini o'tkazgan. Ayrimlar hukumat vakillariga shikoyat qilib, jadid maktablarini yopishni talab qilishgan. Kishilar orasida jadid maktablariga nisbatan "dinimiz buzg'unchisi", "o'ris maktablari" tamg'alari yopishtirilgan edi. Ayrim ulamolarning jadid maktablarga farzandini o'qishga yuborganlarning "xotinlari taloq bo'lishi"ni bashorat qilishgan. Jaholatga qarshi kurash olib borgan jadidlar maktab, gazeta, jurnal, teatrlar orqali ma'naviyatni oshirishga harakat qildilar. Hayot Ne'mati Samarqandiyning XX va XXI asr Samarqand tojik adabiyoti namunalari jamiyatning "Sipehri orzu" tazkirasida yozilishicha, 1914-yilda Buxoro va Samarqand ulamolari Ajziy-Samarqandiyning "Anjumani arvoh" dostonini "kofirlik"da ayblab, muallifni Samarqandning Registon maydonida toshbo'ron qilishga da'vat etadi. Ammo mahalliy aholi adibga tosh otmagan ekan. Bu ham millatning ilgama, adabiyotga bo'lgan mehrini, taraqqiyotga bo'lgan ishonchini bildiradi. Yangilanib kelayotgan va shu yangilanish jarayonida millat taraqqiyotini ko'zlayotgan jadidlar xalq tomonidan bildirilgan hurmat belgisi edi.

Ajziy-Samarqandiy shu voqeadan so'ng "Dar javobi takfirunandang" ("Takfir qiluvchilarga javob") she'rini yozadi. Sadriddin Ayniyning ta'kidiga ko'ra, murabba vaznida yozilgan ushbu asarning avvalgi uch qismi ruboiy bo'lib, unda an'anaviy pandu nasihat yoki muhabbat mavzusi chetlab o'tilgan:

Adibning saqlanib qolgan ikkita dostoni – "Mir'oti ibrat", "Anjumani arvoh" va uchta – "Tajvid al-Qur'on", "Ganjina adabiyot", "Ayn-ul-adab" darsliklari, shuningdek, mahalliy va xorij matbuotida bosilgan maqolalari, she'riyati jadid adabiyotini boyitibgina qolmay, XIX asr oxiri XX asr boshlaridagi haqiqiy ijtimoiy hayotni yanada yorqinroq tasvirlashi bilan ahamiyatli.

Dilafro'z RAHMATOVA.

Otaylor 1947-yilda Narpay tumanida tug'ilgan. Toshkent davlat universitetining jurnalistika fakultetini tamomlab, vaqti matbuotda faoliyat boshladi va jo'shqin ijodiy muhitga qadam qo'ydi. Ijodkorning birinchi she'riy to'plami «Ishqim bayoni» 1975-yilda chop etildi. Uning «Do'mbira» dostoni, «Quyoshni ko'rgani keldim», «Dunyoga tengdosh xazina», «Odamlar uchun yashayman» kabi esse va ocherklar to'plamlari adabiyot ixlosmandlarining qalbidan joy oldi.

“Muhabbatli dunyoning bir fidoyisi”

Otaylor hayoti va ijodi bilan tanishar ekansiz, ustoziga sadoqatli shogird, xalq og'zaki ijodining tolmaz targ'ibotchisi, o'tkir publitsist, mohir essenavis, zahmatkash tarjimon va adabiy portretlar ustasi bilan yuzlashasiz. Otaylor Nahonov o'tgan asrning 80-90-yillarida adabiyot maydonida javlon urib mehnat qilgan sara ijodkorlardan biri edi. Ijodkorning "O'sha ko'zlar", "Lolarang ertak", "Oq fasl" kabi kitoblari bugun xalqimizning ma'naviy mulki bo'lib, she'riyatga oshno ko'ngillarda qo'nim topdi. Ulug' baxshilar davomchisi bo'lgan ijodkor qaysi sohaga qo'l urmasin, yozganlarida xalq og'zaki ijodi, folklor yetakchi o'rinni egallardi. U Yozuvchilar uyushmasi folklor kengashi raisi o'rinbosari sifatida yurtimizning barcha viloyatlarida bo'ldi. Islom shoir, Bola baxshi, Yodgor baxshi, Umarqul Po'ltan, Chori baxshi Xo'jamberdi o'g'li va Qodir baxshi Rahim o'g'li to'g'risida ma'lumotlar to'pladi, maqolalar chop etirdi. Uning sa'y-harakatlari bilan "Islom shoir zamonadoshlari xotirasida" nomli to'plam dunyoga keldi.

Otaylor tarjimonlikda ham salmoqli mehnat qildi. Xususan, karelo-fin xalqlari eposi bo'lmish "Kalevala"ning bolalarga moslashtirilgan nasriy variantini, eston mumtoz adabiyoti vakili A. Tammsaarening "Do'zaxdan chiqqan yangi shayton" romanini, shuningdek, bir qator turkiy tili hamda rus adiblar hikoyalari o'zbek tiliga o'girdi, badiiy tarjiman-



ing nazariy jihatlariga bag'ishlangan ilmiy maqolalar yozib, "Tarjima san'ati" to'plamida chop ettirdi. Shoir 2001-yil 7-yanvarda Toshkent shahrida vafot etdi.

O'zbekistonda xizmat ko'rsatgan madaniyat xodimi, taniqli shoir va tarjimon Otaylor qisqa umr ko'rdi. Ammo shu qisqa umri davomida barakali ijod qildi. Uning she'rlari, tarjimalari, ustoz Mirtemir domla haqidagi kitobi va ko'plab publitsistik maqolalari, es-selari bilan ulug' ijodkorlarning e'tiboriga tushdi, tengdoshlarining e'tirofini, kitobxonlarning mehrini qozondi.

Yaqinda poytaxtimizdagi "Sahho" nashriyotida "Muhabbatli dunyoning bir fidoyisi" nomli kitob nashrdan chiqdi. Unda shoorni yaqindan bilgan, ardoqlagan yurtimizning taniqli jamoat arboblari, shoir va yozuvchilar, do'stlari, shogirdlari va yaqinlarining shoir shaxsi va ijodi haqidagi samimiy dil so'zlari, xotiralari o'rin olgan. Shuningdek, to'plamda sadoqat va samimiyat timsoli bo'lgan ijodkorning ulug' shoir Mirtemir domla bilan ustoz-shogird munosabatlari tilga olingan.

S.MARDIYEV.



Aksariyat xonadonlarda oila bir dasturxon atrofida yig'lsa, televizor ko'riladi. Ammo bugun u orqali berilayotgan aksariyat ko'rsatuv, kino va ayniqsa, seriallarni yaqinlarimiz bilan birga ko'rishning imkoni yo'q, uyat va nomus nimaligini unutmagan bo'lsangiz, albatta.

Milliy seriallar zararimizga ishlamasin

Seriallarning nomini eshitib qotadi: "Qotil santexnik", "Boltalangan er", "Egasiz qabr", "Jalldo qaynata", "Shallaqi", "Xiyonat", "Sotilgan nomus". Bu shunchaki nom-ku, deyishning mumkin, ammo ularning ayrimlarida berilayotgan sahna ko'rinishlari, ilgari surilayotgan g'oyalari undan ham dahshatli. Buni ko'pchilik gapirmoqda, tanqid qilmoqda, biroq natija...

O'qishga ketayotib, avtobus yo'lovchilari shunday seriallardan birini muhokama qilayotgani ustidan chiqdim. Biri uni maqtasa, boshqasi tanqid qiladi. Serialda odobsizlik, madaniyatsizlik, johillik targ'ib qilinayapti deganlar ko'proq. E'tiborimni tortgan, seriallarni himoya qilayotganlar nuqul "zamonaviy"likni ro'kach qilmoqda. Qiziq, bugungi zamonaviylik qanday mezonlar asosida belgilanadi ekan – jamiyatning fahsh va buzqlik botqog'iga qanchalar chuqur botganligi bilanmi? Kimga o'xshamoqchi bo'lyapmiz o'zi? Fikrim quruq bo'lmasligi uchun oxirgi ko'rgan serialimning asosiy mazmunini keltirib o'tsam. Taniqli aktrissalarimizdan biri bosh rolni ijro etgan bu serialning g'oyasi ham bo'rtirilgan maishiy muammolar atrofida qurilgan. Unda bosh



qahramonlardan biri ishlash uchun musofir yurtga ketadi. Ayoli va farzandlarini akasiga omonat qoldiradi. Shunda kelinning qaynig'inglisi kelib, uni eriga "ko'z sug'zan"likda ayblaydi. Bunga ishongan qaynaka kelinning boshiga belkurak bilan urib, o'ldiradi. Mana sizga bugungi o'zbek oilasining milliy serialimizdagi tavsifi. Buni ko'rgan yoshlar qanday xulosalar chiqaradi, yaxshi odamlar doim jabrdida bo'lishini yoki maqsadga erishish uchun tuhmat qilish kerakligini? Uni xorijliklar ko'rsa-chi, o'zbeklarning hayoti shu ekan, demaydimi?

Kuzataman, hind, koreys, qozoq millatiga oid ijodkorlar kino yoki serial olsa, ko'proq o'z millatining urf-odatlarini, afzal xususiyatlarini bo'rtirib ko'rsatadi. Buning maqsadi aniq - kimnidir aldash emas, balki xalqni tarbiyalash, uning qadri, g'ururini ko'tarish. Bizda qachon shunday filmlar suratga olinadi?

Dilnavoz TO'XTAEVA,
Buxoro davlat universiteti
filologiya fakulteti talabasi.

SHU OYDA
TAVALLUD
TOPGANLAR

12-SENTABR

Furqat MIRZAYEV – (1966-2015) To'yluq tumanida tug'ilgan. O'zbekistonda xizmat ko'rsatgan madaniyat xodimi, xonanda.

13-SENTABR

Furqat TOJIYEV – (1913-2001). Kattaqo'rg'on shahrida tug'ilgan. Kimyogar olim. O'zbekiston Respublikasida xizmat ko'rsatgan fan arbobi.

15-SENTABR

Azamat SHAMSIYEV – 1945-yilda Xatirchi tumanida tug'ilgan. Tibbiyot fanlari doktori, professor.

Shuhrat QO'SHOQOV

– 1943-yilda Namangan viloyatining Norin tumanida tug'ilgan. Fal'safa fanlari doktori.

Azim QODIROV –

(1955-2021) Kattaqo'rg'on shahrida tug'ilgan. O'zbekiston Jurnalistlari uyushmasi a'zosi.

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 11 676 nusxada chop etildi. Buyurtma 473. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da.

Bosishga topshirildi: soat 19:00

Navbatchi muharrir:

G'.HASANOV.

Navbatchi:

T.SIDDIQOV.

Sahifalovchi:

B.ABDULLAYEV.



Saytimizga o'tish uchun QR-kodni telefoningiz orqali skaner qiling

ISSN-201667X



Sotuvda narxi kelishilgan holda

